

四庫全書

集部

欽定四庫全書

集部

雲村集卷十三

詳校官中書_臣葉元符

中書_臣劉源溥覆勘

覆校官主事_臣李駿

校對官中書_臣葉蘭

謄錄監生_臣龔際美

欽定四庫全書

雲村集卷十三

明 許相卿 撰

墓誌銘

董子壬墓誌銘

於呼此董子壬甫之墓也董故饒於貲子壬生而穎異
以志自雄猥視家植曼然欲自別於富家兒喜賑施慕
賢達其所游知皆海內知名士大夫子壬足不良於行
嘗重繭三十舍東見楓山公其敦尚如此苟庸劣雖富

貴人奴視之加詬訕焉人咸咎其迂妄子壬弗為變獨
時時好讀書世所傳書無不窺尤好先秦古書卑魏晉
以下不足學時經義程文行天下子壬居校中一簡不
畜也比舍生問示之子壬誦不一再行則大笑棄去曰
淺之乎兒侮聖訓壯夫羞稱焉有司課試得子壬文誦
不一再行則大笑棄去曰怪哉將安所寘是子壬用是
連試輒絀弘治中以薦應敷陳王道獻若干萬言闕下
天子異之下禮部試會要路人子壬故奴視者阻之罷

歸子壬自顧生世弗諧愈益放誕為無顧忌大言廣際
天地幽極鬼神遠遡皇王近逮古今名達罔不評刺人
聞而迂之知者悼其幽憤也或發之詩大篇短章多興
雅可誦然家日落其好施日甚錢粟在前來求者色辭
為可憐狀聽持去持去盡則又破產以施若不知有家
然其子力諍之自若也其父痛懲之自若也既又大苦
之子壬終自若以至喪明乃後已尸居轂食守黑閱光
沒齒無怨言第言我固當爾佛氏所謂業障豈適今日

事耶因號聽光大師三年而卒卒時年五十六子壬諱
淞其先汴人始祖武功大夫諱健南渡居越之新昌三
世祖諱潮遷海鹽之澉浦八世祖諱鎮遷海寧之錢山
家焉祖慧父謙母陳氏配祝氏子男三觀醫學正科升
後其弟湄季益女二長妻浙江都指揮楊輅子和幼妻
同里周玠孫男三女二子壬卒以正德戊寅十一月二
十三日葬以辛巳正月八日所輯聖學全書真儒蓋語
紫陽正脈若干卷藏於家子聞子壬客京師倦游困甚

或勸之幸途媒進取者子壬詩謝之曰我有腹中書不
辨頭上帽浮雲自去來難應鴻都詔衆以為迂於戲其
迂也祇迂於時匪迂於道也哉銘曰

形易用兮至人事嗟聽光兮謾自戲存弗眠兮歿而視
天夢夢兮終古閔內斯文兮誌子瘞光斤斤兮燭九地
踰蹕來兮閱爾世

封奉直大夫南京兵部員外郎徐公墓誌銘

嘉靖己丑月正某日封奉直大夫南京兵部員外郎徐

公卒越某月某日葬於城西某原公三子者斬焉衰經
來曰先公不可作矣維是生有潛懿幸托信傳之譏以
休顯於無窮繫子起之長存也且泣言狀曰先公諱某
字某其先海鹽北鄉人家右其地即姓其地俗今謂之
徐家埭從公先人以為名也公性詳緩言度修慎小大
貴賤接之人各意滿尤為方淵張先生所嘉與也予曰
嘻清濁罔失矣又曰先公初貧於火業醫代耕晏如也
已而泰舉於鄉知光澤縣節任家事咸成進士舉知襄

陽府公以咸封一女有家孫男五女七曾孫男二息肩
熾昌祿養豐備優游二十許年亦未嘗色侈逮壽終八
十八云予曰嘻豐悴皆安矣又曰先公蚤喪父事母曲
致其歡母安乳嫠焉伯兄昌獨而貧公遷共居食沒齒
怡怡也吾母王宜人結髮偕老七十年無忤語舊所
從學醫者安榮氏既死歲時伏臘往祠之至老不怠予
曰信然哉於戲已矣篤倫紀矣雖有他美蔑以尚矣是
在鄉人吾將張之而襄陽吾同舉于鄉兄弟也予其銘

予其銘銘曰

有原堂堂有坎其藏公安歸止公澤泥泥千萬年假我
銘不磨陵谷則那

鎮江府學訓導陶君墓誌銘

君諱試世用字陶氏家世會稽人其先曰義仕元為潞
州書院山長義生仲濂有幹局大其家望於越仲濂生
仕仕生璇璇生懋是為君考君少雋穎父教之治舉子
學長應浙江鄉舉弗利曰有司故遺我哉則閉戶發書

讀之每舉弗利不懈益力七舉連弗利嘉靖某年貢禮
部就學職得訓導鎮江府學某年月之任某月日卒年
六十一妻馬氏孫承學以喪歸嘉靖某年月日葬君上
竈山之陽皇考墓左若干步君居家無子弟之過行已
信於其鄉嘉靖初君貢及期君後者以賄先君君恬然
需次焉會稽貢諸生故事同廩食者人贐廩一鍾君度
其儻貧有家於廩者盡讓捐之會稽諸生貢不廩贐自
君始於戲貪競俗成抑君可謂難也已矣君子男廷奎

廷圭廷進皆縣學生女一孫男惟學承學幼學廷奎行
業修慎人以為君子之子葬得卜奎手君世行年來謁
且泣曰非子銘沒吾父矣予未嘗知君而君之子知予
語曰不知其人視其友況子也哉故論次之而系以銘
銘曰

仕不諧世生不得年嗟哉天兮玄室如錮我辭不泯猗
乎君兮

太學生朱君墓誌銘

朱君卒既久且葬其子來請曰吾父今沒於地矣維先生圖之於呼予忍誌銘君邪其子固請曰非先生重圖之吾父永沒於地矣於呼予忍弗誌銘君邪志曰君諱某海寧袁花里人也祖某能詩畫有聲父某通儻大其家朱氏世望袁花於是彌顯母許氏君出自張張氏倅也而嫡許母君少警敏能承迎許意許鍾憐之維許族人亦謂為我自出君雅性輕財喜賓客不為生作顧計時時召客飲歌呼通昔達旦雜以嘲謔彈棋探鈎六博

投壺度曲謎字靡不工絕屈其坐賓白浮觴酒者君自
邑諸生例入貲為太學生其舍太學召客張飲益劇館
無寒席筵無涸筯然所致客大都六館同舍諸生其中
往往多江左右淮南北兩浙全楚三吳八閩百粵超特
雋奇之選遠賢於君者予是以取君君娶某子男二孫
男一君年四十以嘉靖某年月日卒葬以某年月日子
與君甥舅兄弟也相與少長已相與婚姻又相與肄澤
宮游辟廱忽又哭其死志其墓人之於世何如也予以

是黷然不能昌吾辭銘曰

燕埭有封隆乎而燕喜者子宮乎而燕詒似續充乎而

徐天澤墓誌銘

徐天澤諱霖父延年天澤吃不能言性朴不解承人意
狀塊然無慧者至其識別聲利要緩所當背向了了白
黑如也家入邑治不百武然不一入治廨創堵內屏堵
堊漫矣天澤偶從客過望見之曰嚇那遽如許那遽如
許始終其身不識縣官縣官嘗褒其善榜之衢以風邑

人天澤生成化庚寅卒嘉靖己丑葬嘉靖辛卯十月二十又二日壬寅墓城北通浦堰天澤初娶於祝又娶於錢又娶於宋子男鏜鏐銳孫男五女二銳博士諸生吾兒遊諸生間於銳館因來乞銘銘曰

衆頌頌嘖於邑獨墨墨錮於室吁嗟適兮

大賈顧翁墓誌銘

顧翁諱愷字宗和其先長洲陸墓農家長洲吳郡治所東南大都會賦重俗奢甲天下民故末業多競本業多

病翁父棠念田入不當歲出則舍農服賈去陸墓家西
閭西閭四方水陸達塗諸商百物輸聚翁承父業事力
漸廣心計尤精廢著鬻財於津要之區簡別良苦絕去
眩飾以平心不欺聞都市間於是遠近貿易者繼至輻
湊矣翁測五行之運酌萬貨之情知所以取知所以與
財幣如流水之行往而不停來而益盈始者贏僅十伯
既乃貲儲溢羨累鉅伯數千金於是貪狡悍少年屬目
垂涎利其愿易欺幸其寡援無他於是構令門下生相

與比周矯令需重賄大庇爾家否將不克安爾生險阱
危機巧蒙而橫索之傾其有者三之一翁蹙縮不敢誰
何時獨仰天一喟而已老氏所謂多藏厚亡信夫翁年
八十有九嘉靖某年月日卒卒之又三年某年月日葬
至德鄉支硎山之陰配陳氏子男周孫男元卿太學生
翁朴敦愿諒不學少文言呐呐不能出口人驟與之語
輒面頂赤左右視唯唯爾不即酬邂逅莫可物色其為
市人云銘曰

賈以廉富惟翁足微仕以賄達惟世多能翁業利途士
都賢名今也易常清哉濁清誌銘墓隧於翁亟稱嗟嗟
於翁亟稱

董先生墓誌銘

董先生卒葬有日矣其子以先生同社僧法聚狀來曰
請誌而銘諸則謝曰予罔所知其奚能銘然狀先生者
其有以知先生已夫子其終讀讀之曰先生諱灃字復
宗別號蘿石其先汴人始祖武功大夫健扈宋南來家

於澈浦後仲真者遷海寧之錢山至樂靜翁鑑配虞氏
先生考妣也先生世澈戎籍兄源長當往役先生銳身
代之遂復家澈平居樂義與善根器天植兄累於貧則
割私產讓之其所知鄔魯以田來質逮魯疾草出券燬
焉卒復經紀其葬聞高世賢達所在不計遠近寒暑投
輓納交見後輩工一辭厲一行亟稱屢歎不但已也人
以是多之然先生生不解俗間生作事時時獨好歌吟
所遇節序景物離合戚欣憤愕慶悼懷古慨今一寓之

詩家徒壁立不以經意一時名能詩者吳下沈周關西
孫一元閩中鄭善夫皆郵寄賡唱遇佳風日放浪湖山
流連親知嘯咏忘返好事家往往除館以待先生紀之
為五館記云晚造陽明夫子聞良知之說愾然改曰不
爾得稱人乎悚然就弟子列時年六十七矣故所與游
者聲味色招之先生但曰吾從吾所好已爾更號從吾
道人先生末復究心內典忽若有悟喟然歎曰乃今客
得歸矣於是援匡廬故事與聚糾諸縉俗同志結蓮社

於海門精廬遂又號白塔山人嘉靖甲午某月日卒葬
以是年某月日配康氏繼莊氏子男穀鄉舉士女二孫
男鹿鳴鶴鳴於呼先生我丈人行也忘年友予餘三十
年矣吾見先生始專於詩遺其家甚難之晚志於道遺
其詩甚愧之終入於佛嗒然自遺也予愈益怪之莫能
窺已觀乎聚之言曰先生在先劫中殆業養龍氣相感
召近可遠大可小有可無虛實相因動靜相體若有類
焉蓋先生學三變歸於空而自所謂吾者且見為妄矣

尚安事銘予將安所銘無寧試妄求之亦慙妄應之耶
銘曰

一顆蓬翳蝶化蟬蛻吁嗟董翁墓於是

石洲徐君墓誌銘

徐君卒之又明年嘉靖二十一年冬十月庚辰君子造
士禾墓君萍江之陰而述行問銘嘻吾病力不任斯勞
也禾絕欲得之末之能窮以辭則遂刪次禾語云君諱
翰字時舉其先出自偃王海寧有徐代遠莫究其所從

徙君九世祖肇家廻塘稱廿七將仕而徐始聞廿七將
仕五世曰慶當明興舉按察僉事山西而徐始著慶四
世曰侑侑生樂閒翁瑰配倪氏君之考妣也君生有偉
幹重容止瞻盼炯然推魯不文而鬱有茂質君大父喜
摩其頂曰兒守家似此洲石不與波下上吾死瞑矣君
後故稱石洲云君事親愛壯猶孺子慕不衰季喪其貲
輒睨羨君輒亦分與貲東鄰齒屋鼎鼎或舉榻傍鼾睡
語諷君君墨墨退命禾曰先人世鄰習相安已而忽相

圖不祥抑人情欲保其家夫庸異我我老屋世守四百年後之人不失舊物又何求里邑相距可十里里族往徃竄名繇籍供事縣官與廝役伍然得昵顏辭矯威福私苞苴肥其家繇逮君恧然曰吾其忍卑身辱親以徼利及共侍輸將重任遞更直奮承之曰吾物力固當訖不用計嫁旣於中產家然君於是盡瘁矣時時飲嚙嘯呼貌軒然暢也而精殆銷亡一寢疾不復起年五十八耳是故禾以不逮安榮君為終天憾君娶祝氏子男造

士禾也方致遠昌其宗庶末女亦微出孫男善盾郡文學諸生女三系曰予昔如迴塘及見樂閒翁篤塞淳固若慳慳爾今夫樹敦懷朴之世邈其懸殊絕追逢矣莊生云得其似者而喜翁將無同耶夫徐君以彼其家無資於學而獨率乃考攸行卒能持滿不溢傳其宗嗟夫孔子寧儉而野之從也有以哉淬流如帶新封若堂叶允矣石洲屹如逝波海國斯風

南園祝公墓誌銘

邑並海東去可五十里許有奇山谿綰轂左界物力人文素花最盛素花擁素封列顯秩者一姓當十之七甲舍名田綿數十里相錯如繡祝最盛祝氏支姓扶疎勢不可緒例古立宗而其宗子曰南園公南園公諱椿字惟喬大父銓父滄早世南園公方弱顧三弟孱如爾南園公則感厲自奮植外理生作內篤恩紀暨其配徐悅其母董姁姁也字其弟甚愛析產曰等遺孤均遺業耳四如一有役曰家督事也獨身任之已又一一經紀其

家遂有殖厚貲十故產者南園公子男三人女四人繼
昭主簿當陽繼暄娶而天公左右其孤孫無墜厥遺女
家並著姓弟梧晚無子則以季愛子繼時子之繼時生
世家世守世宏梧後以繁飭諸孫各事世事世臣邑訓科
世祿南太學生世匡世巨世匪職生作南園公乃喟然
太息曰夫造物者佚我以老吾其後尚平乎則傳家灌
園與其繼配姚侍美瓜果日弄諸曾孫為笑樂嘉靖丙
午公年八十八矣某月日卒南園公生而敦愿訥口少

言悛悛如鄙人至其勤生嗇用殆天性然田畔屋隙鮮
弓地棄童奴及五尺所無浮食者治上趨時具有節法
歲入視鄰收常倍然蓋藏羨盈而供需纖儉服食婚嫁
才取給用充禮董董等中產家弗少贏若乃創祠薦事
豐潔壯整殫隻力靡百金不少顧計於是族長老共譽
歎南園公稱祝宗子無一後言夫昔者先王以宗子收
族是故仁睦行而民不悖約法省禁有以然也祝之有
宗非盡先王之故是蓋先王之遺已乎志化理者自遺

達故以導俗誰不其然吾於是信古之必可復而歎時
之安於今也南園公卒之四年嘉靖某年月日世臣諸
孫筮葬公南陽祖塋之左來以銘屬先是十許年南園
公杖策奉幣走謁予椿旦夕歸復於土幸子文識我藏
則曰諾夫古重心許乃今食吾言乎於是序列其大都
而系以銘銘曰

知如禹湯不如常耕公老服膺孝弟力田漢秩尊顯公
允其選勞避賓筵拘憚冠服率彼民常敦然太樸信已

獨行若與俗兩十畝終間五福備享我最淑行永詔鄉鄰叶尚百千祀曰猗與南園公之阡

平齋沈公墓誌銘

維嘉靖三十三年十二月二十二日平齋先生沈公卒於嘉禾寓舍年七十二方島夷寇暴三吳公抱宗祏祭器避之郡城居亡幾何公疾病其子壻刑部主事平湖胥峯陸君杲從厥子南禮部主事光祖兩鄉舉士光裕光祚皆公之自出也來候咸集左右公諸子藉顧言治

後事所以嚴其終者致情中禮矣公卒之明年嘉靖某年月日某甲子葬公於其它之某方二城圩新阡胥峯狀公世行年授公諸子來屬予志之狀述公世家土著嘉善麟瑞鄉高祖恭曾祖璘祖鏐三世輸財助縣官被冠服鏐生南野翁葵娶陸氏公父母也翁籍世賢望好禮尚賢貴飾之沈由是著聞郡中公則翁仲子也諱槩字一之稟穎負奇盛氣濶步縱睨無前已而師事東溟張先生福友善魏莊渠校邵端峯銳諸君晚卒業於五

清劉夫子瑞德義漸涵日與之化闇如退如稔識公者
失舊觀矣公性簡朴於凡諸玩外飾無所役其志惟親
故緩急懇然若當其身至其事南野翁陸孺人也巨細
周慎心力懇到事可承歡者靡不畢致候少異常也輒
懷隱憂迎醫不遠千里至歎噦洩便亦嘗偵驗物色以
為喜懼二親相繼大故苦由疏水喪次三年率由禮制
而哀敬有加焉時稱善喪云夫孝先百行公惟篤於親
以達其類故建祠備器祭嚴忌哀以親之所始終也存

大宗之祀贍母家之貧恭順姊兄撫教甥姪以親之所尊與其所愛也捐田為鄉義塚垂老而齒讓人貢則親其親以及人之親也若夫修志史才登高賦咏特公之餘十二試省闈羣八校雋選又公之細耳狀曰究公心跡學欲窮天人志欲希賢哲行欲質鬼神又曰公口不非俗而行不染俗允哉斯語為公傳神矣公生平急義輕財贏業晚匱自安無營著布菜翁傳以見志其於豐約盛衰之際蓋有見於易而契於予者比官采士議躋

祀公於學宮鄉賢祠信定論云公元配錢氏生女二適
國學生陶陞及胥峯君繼張氏生子五燿炯炫燭端孫
男六女八公所著鄉約釋義筆思記時務議詩文集若
千卷藏於家皆鄉意風教非漫作者銘曰

混混末俗胡丁我躬今見古人差強我束儵去先我奈
何乎公
公應貢授都事江西布政司不

書非公志也

見山孫君墓誌銘

監察御史孫君葵其父見山徵君於盈山南麓嶽神祠之左述徵君世行年來謁予書其墓石曰徵君諱鸞字鳴遠其先富春人粵自漢季孫氏國吳傳四世歷六十餘年胄裔布於湖南江左根盤蔓延矣富春乃孫氏所肇迹云徵君常自言相傳裔出長沙桓王策之後遠莫究其緒來籍海寧也亦莫記其世其始有徵者曰富一提領春春嘗問學於包心齋氏包選春諸生中以壻其子春生以敬以敬生文達文達生裕裕生燦燦生禪是

稱遺安配董氏祝氏徵君父母也徵君而上八世家黃
灣黃灣遠都市瀕瀉鹵地亢土瘠無水泉林藪之饒百
穀桑麻率仰澤於天以殖農圃盡瘁三時高秋旬日不
雨則嘉種稿無遺穗而艾蕭藜藿芄芄彌望壟畦間以
故些窳偷生鮮積聚而多貧豪有力者居停鹽監廢著
鬻財機巧乾沒以與上爭利頑弱無能為計則交通海
賈屏匿幽隱為之駟僮以私竒羨官為峻法苛禁姦利
相告日聞徵君於是喟然歎曰吾聞本富厚生蠶穀是

已將如吾地何乃如鄉習雖子本纖銳而贏得過當然
為姦富抵禁亡命有家如寄謀其左矣孰與教吾子以
大吾家乎御史時方嶄然見頭角徵君則為訪明師友
市經藝諸籍趣辦資糧裹葛屨簪笈及凡裝需縱使
游學而時課督淬厲之歲無幾何御史以嘉靖丁酉名
鄉薦戊戌舉進士至今官列侍從司風紀便道過家旂
旌騶駟呵呼導從塞途盈門御史穿繡登堂稱觴為父
母壽雍容閒雅甚都鄉人士以為寵諸父兄乃後漸舍

故習而延經師課子弟以徵君父子故徵君晚以子貴
益閒無事時出嬉游巷陌讌集里社從故親知農談情
話坦坦夷夷不矜重改其舊人多愛譽以為美談徵君
年五十九卒以嘉靖某年月日葬以某年月日娶許氏
子三長御史喬其季高也女二孫男四狀述徵君孝友
庸行可稱者不一予特取其卓見不淪於習者著之銘
曰

帶海負山墓於是間風氣盤旋庇爾子孫於千萬年

泉亭吳先生墓誌銘

嘉靖二十四年二月乙卯朝列大夫廣西布政司左叅
議泉亭先生吳君卒訃予予扶而哭諸門君之子鄉舉
士遵晦郡博士諸生遵道書君顧言來曰知我者許子
其託之識我藏噫嗟已乎吳君逮死予信忍以疾為解
志曰吳君諱鼎字維新錢塘城北隅人也父宗裕封承
德郎刑部主事母陸氏繼母戚氏妻顧氏贈封並安人
咸以君故君少慧嗜學父母念獨子重苦之交禁弗為

止選錢塘文學弟子員朗秀駿踔氣蓋一時衿佩少年
諸司勸學較藝輒皆取君冠其曹君正德中進士釋褐
試吏尹臨淮臨淮帝鄉壯縣民多優復習游惰公私玩
愒謾偷政廢不舉糾紛倍十左小邑宿吏側目少君君
顓識敏裁便宜張弛更以辦治稱監司使者僉上君治
行異等堪風紀選不報殺皇帝南征侍衛中外諸臣騎
乘數十百萬所過縣次續食有朽事中貴人道臨淮非
分徵索供具無厭橫甚君從民吏往致常饋不贏中貴

人大缺望憤詬呼挺君銳身先民吏當之民吏爭前衛
君擊傷中貴人中貴人奏逮君繫詔獄一歲所者廷議
白君還治用舉者徵為南京刑部主事轉南京兵部主
事以承德公喪罷歸除喪謁告不任者十有五年用舉
者補南京兵部員外郎轉南京禮部郎中遷廣西布政
司左叅議乞侍養亡何病卒年五十三君方病甚二童
奴擁之坐氣漸微而神不亂忽左右視曰爾孰誰耶吾
其死於吾兒之手二子舉扶代之若將寐者而絕君起

寒約性鯁諒力學自立危行不疑恥媿姁苟同孤立行
一意而已俗或病其不諧以哆憎口然居約奉繼母當
其心裴嫁四女弟甚周與人謀必為之盡當官事關利
病直往敢任不顧計前却故所至舉職大節斷斷士亦
以此多之一時顯望魁人往往折輩行慕與之交然仕
不充志壽不盡年懷挾其所未究溘然長終已知君者
莫不傷懷垂涕云君生好文特甚其為臨淮罷劇猶手
一編吾伊空堂中治當南北達途過客時有中原文獻

家博文邃古諸名士大夫君輒委已交驩與相下上其
論既謝病屏居愈益專力萃精償其積志六籍而下九
流諸子策士春秋先秦盛漢之譔古金石竹簡之傳旁
逮外家雜說譎誕怪迂之語凡竒古文字罔不雋飫醇
酣江左北朝以還唐宋近代諸名家亦皆決藩入與神
詣作者故其文深涵大放瞻蔚閎肆能盡達其意所欲
言淵乎蒼然有西京氣骨君率歲一訪予紫雲山中坐
語移日扼腕論文纚纚弗能休予曰雅哉辯然非藝乎

末耳吾哀勿事此也久矣君素多病奈何散精以徇末
孰與斂英沃根毓神以貴而生乎君憮然離席曰愛我
哉陳義甚高僕將從子於忘言矣然君文聲藉甚紹介
屬筆者彌衆不容自解免焉每一篇出學者爭傳諷之
邠諸老先生辯博能言者皆自以為弗及也時有紀述
莫適自任必推泉亭先生云二子好學世其家女一孫
男從周從時女一墓在積慶山南麓葬之日是歲十二
月戊申銘曰

有崇斯封有坎斯宮有斐君子歸藏于中有氣隆隆湖
天亘虹後有王朔氏揚袂障日而望之曰咄咄佳哉其
下殆古之人以文雄者乎

明故中順大夫江西贛州府知府沈公墓誌銘
公沈氏諱南金字子輕家世郡城人公始名節為錢塘
博士諸生御史行學按籍更公名南金公不意慊也子
輕蓋公矯辭以見志云高祖恒負識幹當國初法峻隱
而賣卜曾祖哲祖宗壽傳術於世父正術時遂世陰陽

家學考俊以公貴贈文林郎南京大理寺右評事妣朱氏魏氏公魏出也贈魏孺人孩幼多奇童卅有志操正德五年舉浙江鄉試六年會試以乙榜署江西萬載學教諭嘉靖二年舉進士三年授南京大理寺右評事厯寺副寺正德十年遷廣東廉州府知府更賢補江西贛州府既又補雲南鶴慶府移病老於家嘉靖三十一年六月十四日卒年七十九公賦性簡諒操行介特事徇其心不憚違俗所親或規之曰世同混混而子獨以

子子矯之其的而招射哉公謝曰唯唯否否夫吾信吾心儻庶幾於道或猶十一二已乎嘻俗去道也遠矣焉避矯處家人嗃嗃侍親側更溫顏婉辭若兩人然諸弟嚴事之不為降至其婚嫁貲費力補苴之必周教萬載抗顏督厲造就科名士加昔守廉以誠長者處官民犯盜竊猶覈情時有縱舍不文法顧計也賴當達塗巨鎮重臣宿兵民脂髓涸供饌矣公身先節約力任興革多方亟圖民望更生而公以杜請托忤時貴排迫左遷罷

歸知者哀賴人而惜時舉措之乖歎公不能取容當世
殆少激也與公居鄉簡易自便不事矜飾儀觀無故未
嘗割鮮兼饌糲糗蔬茹之餐通帛大布之服蕭然故諸
生時等耳郡仕而歸者官例供輿隸公舍而徒行行未
嘗入公府也杭故宋京師江南大都會自昔以繁麗名
產豐習侈為天下最公獨嗇陋涼約居其間人以不情
猜焉縉紳士則憚屈之然弗甘也或斯靳之曰夫夫也
是謂苦節不可貞者耶公為不聞也者矜澹泊為寵榮

懸車及就木二十許年一日也蓋其資於世也儉故需於世者廉古有清白吏今曷愧焉部刺史誄之曰於今伯夷也言少褒矣來者或可取微云公方疾甚醫議灼艾曰止生死由天毋重困我疾革諸子問顧言曰更何言更何言無怛意夫觀人至於沒世復安所適其情公超然若客而歸以語素昧公者將亦信其平生也已公娶陳氏無子繼亦陳氏贈封並孺人子男五希渭太學生例以貴為杭州右衛署指揮僉事希瀧邑學生希洵

庶希準希濟女四長壻邑學生金榜次壻太學生林恩
次壻郡學生莫曜庶女幼孫男五女五公卒之三年嘉
靖三十三年十二月二十四日庚寅葬公靈石山之朝
陽五子者聚相泣曰吾父潔修潛懿今隨死而亡後將
無復知有吾父者吾曹不予死吾父矣夫先民既沒而
德音猶存者賴之於紀述也孰為言立而傳一二遺行
俾書之石耿光於永世以焜耀吾子若孫繫吾父為不
亡也五人拭泣相慰曰可可於是希瀧以嘉魚令李君

璣衡狀來請爰論次之而系以銘銘曰

湖水浩汗兮山石巖巉陰林灌木兮偃蹇連蜷莽一丘
以薶玉兮穆清風於陵樊天地無窮兮聲休宅而弗泯
長谷逶迤軒騶歷茲兮志士式焉曰猗嗟乎清修獨行
之賢

許天德墓誌銘

許古太嶽之肩有國於許者因以國氏乃後族派流衍
天下許在海寧世家袁花里譜可見者宋四九提督四

九生千六承事千六生春谷諱嗣榮春谷生盛甫諱茂
昌盛甫生同知海州諱懋海州生文英諱樸文英生耕
隱諱斌耕隱生守拙諱緡守拙生存誠諱源存誠生乾
是為天德園花許氏天德蓋大宗世適云初存誠及天
德髻而喪父天德幼特孤苦晚更疾廢凡名勢榮利俗
所歆艷快適事天德生不百一遇許族故而敝習挾故
而靳下人歲時燕叙羣從斬然寢然各矜先物自多天
德貌寢辭訥甚羣居廣坐中狀孱如退如鈍弱人也間

嗚侮之軌默不應獨時時承母意得其歡守宗祧罔墜
業事諸父無違禮真白敦慎內行可訾殆鮮矣世常外
徼而或倖得之以自能然垢心穢行多內疚者而世患
亦卒不免焉天德病痼丈室間無能一逞以適其願欲
然因而獲免彼之悔尤殃釁亦多矣其諸所謂世為不
祥而達人以為大祥者與天德生成化已亥卒嘉靖乙
酉年四十七娶俞氏子男三聞善邑博士弟子聞義聞
道聞道出後季弟震女一天德卒之若干年嘉靖十五

年正月庚申葬洞孔山春谷府君墓右少南若干步銘
曰

高翔鍛翰工謀速患雌伏拙藏以免於今而無忝乎吾
先於乎世多天刑而天德將獨天全者邪

雲村老人墓誌銘

雲村老人伯台氏名相卿許故族居杭之海寧靈泉里
晚徙紫雲自稱雲村老人云老人生世七十九年嘉靖
三十六年秋寢疾知不起且慮子若孫徇俗飾終將乞

薨文誣我蒙羞入地無絕已時已恐來世有稽無徵也
則手書於墓石曰雲村老人平生行業無可紀撰先古
系緒載於湛若水志皇考封給事中府君墓語中老人
以成化十五年九月十六日生於外祖父俞氏三歲失
哺少長善病弱冠始為學甫壯仕於朝給事中歲餘自
免歸久之以中外諸司薦詔補原秩辭疾乞致仕以竄
籍鮑郎鹽課司奏聞報可於是結屋紫雲山中水石幽
勝處食力詠志讀書彈琴無一跡抵親交城市四十許

年而終嘉靖三十四年四月島夷突犯海防老人走折
左股一捫之頓踊呼號曰人同有生之樂而吾獨不免
殷憂畢此生哉夫天之賦我者學未克見於道父母之
生我也老乃更殘其遺忘親不予負天非人奈何尚猶
立覆載戴面目名人也乎痛恨不終食輟也老人長子
聞過先老人死晚舉少子聞造過子敦儉敦儲儲質美
而殤儉子令已令甲令丙嘉靖三十六年八月初九日
鷄始號老人夢指畫太極圖動靜交處已而吸清露三

巨觥味爽而寤遂病日彌留銘曰

嗟夫子乎冥驚畏途冒襲慚譽一真旋隙衆患攸萃室
嗜辛螫巷聒羣吠物匪胥戕事有必至聞之先民知我
希而我貴吾乃不得與此吾徒生死而已爾

兒子聞過薶銘

許相卿喪其子聞過哭之病已乃慨然曰過命在天吾
讐天乎悖矣及葬復慘爾於邑曰吾誨過學戒衛崇晦
晦乃沒世將遂使過懷竒歛英而終古闇然乎忍矣於

是反袂雪泣而志之曰聞過相鄉長子也母孺人沈氏
正德己巳從予留都太學解裝兒生故命曰都小字圻
孫予時授掾禮部禮部郎故暴人習陵士遇士輒聲色
誰何折使諂承之予長揖見則愈益怒譁徹于門大宗
伯召讓郎而名禮官罔知禮士耶諭之交謝俱解或聞
諸先諫議先諫議寓書曰兒出門便氣動眉睫問將安
所究遠圖予展讀長跪曰兒過矣兒過矣因定都名聞
過冠賓查陟齋字之長復云嘉靖初予官諫垣以過往

不二年所喪吾妻李氏疏乞以過還過資頴日新予適
善病因謁告終教之為娶于朱生二男子敦儉敦儲儲
甚淳且慧而殤於時過且壯予將傳而過日病益甚弗
瘳初患脾肺鬱痰伏火疣潰左股間嘔泄作食飲悶羣
工攻之罔功過臧噓執予手泣數行下曰兒寧自意止
此嚴固詎宜有此恨靡却書為解嚴其自安其自愛兒
去矣不復待矣傷哉慟乎嘉靖丙申八月二日也年二
十八耳嗟乎痛哉予方委過吾妻脫身游汗漫天下名

山五嶽間凌雲絕塵縱觀扶輿磅礴之妙予旋復以快
吾平生也過乃死棄予予塊守孤山丈室中終吾生生
奚以為於戲天喪予已夫過性強記日數千言六籍默
識成誦尤喜左氏內外傳首尾錯舉不遺予曰韓退之
浮誇少之信哉未必仲尼意也則遂輟博綜諸子特喜
三閭漆園韓公子列國策士至荆聶兩豪事壯之捫腕
恍然思起與之遊予曰咄兒所趨愈下矣後弗復爾則
又輟成童為進士學出口多老成語嘗羣兩浙諸生試

三塲省再連再黜予私怪之間理遺帙得過手草古賦
雜文可百首古近體詩歌數百章類皆超逸弘肆如生
駒未服轡銜而神駿非圉人所馭予彌怪之盡發其藏
選苑諸書漫不可手矣則庭責之曰文以載道未知道
奚其文立燼之火自是乃專於學嘗曰孰誰賢擬茂叔
絕學千載後精詣粹養殆聖已乎駸駸上達尋及於患
前知過當爾盍慙縱之讀快意書作出格語成一家言
鳴於時頗束縛之使不一逞死也於戲天喪予已夫過

少慕任俠喜論文諸凡榮利一不置意中見富勢矜挾者鄙外之若將浼已予急繩馴養後更慎厚頴鑒故自了了而渾然不見取舍汎接鄉人鄉人樂與之出遊學官諸生間學官諸生樂與之厯謁諸老先生諸老先生樂與之陽明夫子尤亟稱焉雖習交者未嘗聞其言人過家人終不見其諄語頴色也死之日遠近知與不知罔不傷嗟涕洟云予生數竒動與世左望實不遂亢宗忠誠不果徇國行義不及孚於鄉人而丁年稅鞅遁跡

離羣若與世隔意有待於過償吾負焉爾過乃溘死先
予予其永愧忠孝而長為俗之不祥人耶於歲天誠喪
予也已矣憶過童年北遊賦大觀擬封事硯席流聞雋
聲隱然起都下過從縉紳交欲識之予堅謝疾辭乃後
已夫深蓄期其遠到而竟止是豈生異於常者宜荷其
奇予顧抑遏掩藏弗使穎出於囊神故憤奪以還造物
者不然有為生之孰亟斃之無為生之孰厚畀之厚畀
之而亟斃之如石火電光一過不復遺也何與吾無所

致詰也已嗟嗟慟哉過死踰月季秋丙辰昇其柩葬兒
山伏虎岡嘉靖二十八年十二月二十六日改葬六十
里塘陰插花山其母沈李二孺人兆左系曰

爾來過往吾勿獲食爾力予老疇依世安所置長物寸
裂予腸咎誰執五氣交運將不齊焉爾是值吾獨且奈
何哉百歲倏忽行從爾地下遊萬千年胡終極

雲村集卷十三

欽定四庫全書

雲村集卷十四

明 許相卿 撰

墓誌銘

太安人鄭氏墓誌銘

許某曰婦道不亦重哉然教弛俗流士鮮完德而女婦何以稱焉太安人贈刑部主事海鹽吳公諱寬之繼室也孀吳及紀而稱未亡人方夫隕天泣血手二三孤嬰煢煢焉躬衣食而教之持久靡忒卒就其子以至於有

家受封緊吳宗是賴婦道顧不重矣哉顧不難矣哉於
戲是宜述以為人婦勸也已於其葬也為誌而銘焉誌
曰太安人鄭氏家世平湖人父諱肅母茹氏敦茂一德
是生太安人年十七而嫁年二十八而孀居嘉靖四年
二月十八日年七十八而卒以明年正月十九日葬於
大易鄉玉壺阡刑部公之兆子男二人伯昇仲昂山東
按察副使女一人孫男六人綬組紱纓緒維女六人曾
孫男十人女一人太安人初歸聽順莫可非儀旋惟家

難蹈厄茹辛而志操才識卓然於是乎見攻苦織紉無
一時自逸內外費資其手者歲十二三一布被六十年
舉示孫曾曰此吾嫁時物也君子曰善居約也以儉勤
先姑氏卒以幼女屬太安人育而嫁之甚恩叔姒韓暴
疾死即以已手製衣衾襚焉歲率按察兄弟上鄭公冢
泣下低徊久之及老猶然君子曰善親親也以敦愛按
察初為宜城分俸歸養太安人曰嗟輟汝養廉者廉無
乃妨後弗復爾正德中例旌孝節有司首議太安人應

詔太安人則謂按察曰吾婦道之恒爾業已受封敢微
再命汝其力辭鄉鄰困暴征聞愁歎聲戚然曰饑歲民
貧刺骨忍更涸其髓乎命按察必言之郡郡弛其限君
子曰善約已殄物也以仁讓太安人之行多至可稱者
如此而丁年遭變初心素守之死不易其常蓋以節始
終焉可謂賢也已故時大夫士之文者壽以詩紀以序
傳封制有端莊勤儉之辭邑里諷傳欽贊以為允按察
與予善信古篤行君子也及予序次太安人世行益歎

按察之賢有本哉銘曰

猗太安人允女君子懿懿羣行貞以終始惟家實造惟
賢實嗣壽有為歌葬有為紀於昭方來以徵女史

先孺人遷葬誌

天乎傷哉痛割終吾生已夫天乎憾哉怨咎終吾生已
夫夫有令德者享眉壽受多福常理也人之獲其常也
恒十六焉嗟嗟以吾母令德而無一遇痛恨固不可為
解也已或少諉者數值則然若夫身後之重阨多難則

惟不孝子萬死莫贖之罪何復藉口於數之適然者乎
爰舉吾母生前之令德及其沒後之阨難而不孝無所
容於覆載矣舊嘗受讀四明者儒徐恕先志吾母之墓
曰許少婦俞氏石泉翁之季女也母城陰故族居氏少
婦生而貞肅閑靜不輕言笑不妄舉動婢使一一畏順
承事無譁者室中穆如也婦性敏慧女紅諸技不習而
精顧好讀書幼弟晚塾歸常令指目字義遂通孝經曲
禮列女傳歎曰載之書者女婦分內事不爾內無教家

曷賴焉及笄而歸許生某適翁喪子幼強許贅生其家
則與生協抗家難防禦侵侮調劑糾紛卒完業授其弟
無私焉婦生子宅相甫晬言動必示之正三齡呵禁日
嚴人曰藐爾孩那遽如許曰聞古賢聖多由教成語云
桑從小搯長且不屈矣成化十八年十月二十八日卒
年二十二明年十月二十五日葬祔祖姑洞孔山兆志
首云云不忍率讀也天乎傷哉痛割終吾生也已夫
久之水由穴中出遷祔靈泉山祖母徐兆則弘治十六

年十二月二十二日久之水又出穴中嘉靖八年十二月二十四日又遷唐家灣谷中已而唐灣穴水如靈泉忍痛將事遷南湖之陰几山之陽則嘉靖十二年九月二十二日也唐灣啟遷也相卿痛憊而仆馮棺枕肱淚眼甫合若有昵棺而言曰是中水晶骨耶意私占以為祥孰謂妖夢先水孽哉於是怨痛劇而神慮殫嘉靖三十三年十二月十一日肅啟妙果山陽相卿壽藏永奠焉嗟嗟後來百千世信康裕矣奈前去數十年厄難何

天乎憾哉怨咎終吾生也已夫吾母令德以古貞淑律
其身以賢豪名世望其子而不獲一受諸福乃久困沮
如疊震畚鍤歷諸阨難禍孰致之噫不孝之罪上通於
天矣聲竭淚枯更忍興言及此乎去今幾七十餘年相
卿有子聞過聞造女四各有歸過沒有子敦儉儉有子
令已令甲令丙後昆禪續往迹湮淪而遺編故在也時
一展誦手澤漫如輒長慟欲絕嗚呼天乎相卿胡不先
吾母或猶免於阨難而相卿今猶苟活也嗚呼怨已哉

人孰不本於親耶而生事死葬孰不於斯自致其情耶而又亦有因母教以成賢聖者矣不孝惡極斷深天俾不逮慈訓無以成德莫可為力矣而致吾母重阨大難則謀之不臧為之不慎召茲大譴也噫不孝之罪上通于天矣聲竭淚枯更忍興思及此乎況忍自述也乎哉雖然又忍自飾也乎哉忍死志之上俟昭鑒于天誅殛不孝為世為人子者戒下詔後人俟其聚訟不孝為世萬子孫慎終者懲我死無但裸葬為也必甘暴骸中野

以俟天人之交責焉耳已矣嘉靖甲寅十二月七日不
孝哀子相卿泣血誌

祝母居氏墓誌銘

邑故多舊姓遺俗城北居氏尤以篤塞謹信稱與人藹
然若恐傷其意而閭閻聲迹肅如也穆如也家教子女
咸若成性然孺人處士理之女也歸袁花前廣東石城
令祝君繼英孺人卒時年七十五為嘉靖三十四年十
月三日後石城死二年一月葬以是年閏十一月二十

三日甲甲墓東陳村合石城兆子三世名先孺人天世
言世占皆邑學諸生孫男以順以頤以須以預以思孺
人生而溫密靜恭閑家教甚夙來嬪於祝祝族方昌尊
卑屬甚衆孺人上事旁接下應無不宜者偕石城白首
未嘗見詘語頰色也家食僕婢千指而盈孺人斟酌衣
食斟酌曲當以恕掩其過以峻篤其悍以宥寬其不及
內諧外附門內裕如也孺人性樂勤尚儉造次生作事
不少弛園田沃瘠農蚕盈歉刀布出納字畜息耗貿易

良苦皆周諮旁稽不遺暇復紉補饒饒老矣猶績紡緯
絡不怠殆終身矻矻也初石城蚤隸宦學晚仕歸休徇
祥縱適抹搯世故沈冥酒德誇詡振施一不以家闕念
而業饒畜裕倍蓰徃初以孺人殫力綜理於中也夫孺
人歸祝熾豐可豫弗逸已盈不侈而樂盡其職壯老不
忒其常此嘗學問之民之所難而以女婦能之是尤難
已嗟乎王教熄而士習遠古矣尚何萬一冀淑行於中
菴耶雖然徵之孺人求婦順於家教其庶幾哉銘曰

東陳之墟水匯土龐夫婦同藏庇爾子孫熾而昌

太安人顧氏墓誌銘

贈刑部主事海鹽鍾君諱海之配封太安人顧氏年八十有一卒是為嘉靖八年九月十二日葬以十年七月二十一日太安人子邑博士弟子員棟中順大夫知南昌府梁銜恤哀痛撰次德履跣二舍而來問銘先以陳翁鑑曰太安人之處也為父母所賢愛其歸於鍾也鍾門內罔不宜主事君初丞懷遠懷遠令躁誕好陵人主

事君積不相能也釁日構不解奏與之辯七年太安人
攻苦食淡紡績資之時慰以好言曰是固有命存絕不
出愠懟語事白復官萬安則曰是果有命存卒未嘗色
矜南昌兄弟髫而嬉戲太安人愕曰兒可儒也亟白主
事君遣歸就傳衣糴修脯率太安人手具口畫授之遂
皆有成伯經術稱高第弟子仲進士高等再守劇郡治
能稱最一時斯主事君太安人所由貴也太安人老而
傳也祿養豐備猶親女紅南昌色勞之輒恚曰而忘懷

遠耶抑吾常有味於敬姜之屬文伯也人謂太安人約
秦屯亨之際類知學者於戲其信然乎予讀詩列女傳
當時公侯大夫士之家飭行修職相其夫若子而王道
賴以成豈其女婦則賢將上之漸導有本而俗成固當
然也今世女子子師絕不聞至夫羣士於學宮而教之
累百不一賢而太安人可稱者如此殆性然哉予是以
訝歎為序而詩之系曰

武原有邦叶海潤土厖開濟之阡灌樾秀深叶廓其坎

而崇其封於戲是惟鍾子之母之宮

聞人母周氏墓誌銘

鄉貢進士聞人某以嘉靖十一年冬十二月壬寅葬其母及日三舍跣冰重繭來紫雲谷中問銘於其父友許某納狀曰母夫人周氏海寧洛塘人蚤喪母子於繼母能以孝得其憐視後出者埒同產焉周族曰允哉女迨歸先君君姑氏嚴臨諸婦如束濕薪夫人婉承風旨卒宜其順聞人族曰允哉婦夫人生不孝孤若干年而喪

先君茹辛銜恤身任家蠱日程不孝孤讀父書窺其奮與急與其友之賢不肖以喜憂既舉於鄉族嫻贊喜夫人愀然命孤曰鄉嘗舉而祖矣鄉嘗舉而父矣用不當才才不逮用命矣夫汝其思紹奕世未償之志母或以此舉自多内外族咸曰允哉母初先君喪殯於堂比鄰遺火隘屢委巷烈焰炙天孤狼顧呼號苦由間罔知攸措夫人不顧蓋藏疾呼遷殯獲免孤偷以寬逆天之戾焉又曰夫人生富侈適清約先君宦學隻力事家中惟

百憂又屬孤學家無所於委日強事事孀嫠劬瘁餘二
十年弗一日弛於其初其心望不孝孤者十半莫晚也
而今不待傷哉壽六十又五子男不孝孤一人女二人
孫男鶴鳴女二人悲夫非夫信傳之撰永流淑聲不孝
孤終天淪心之痛曷為解敢跼聽命進士君器業隱有
遠就予雅信焉爰序次之而誌以銘銘曰

破岑雙雙中蜿流虹東椒之隴有坎幽宮伉儷同方庇
爾子孫繩繩

陳邦亮妻黃氏墓誌銘

海鹽陳邦亮之妻黃氏歸十二年卒年二十有九矣越若干年嘉靖某年月日邦亮藏其柩於某山而銘屬予夫女婦之行不越閭吾其奚徵又將奚銘既邦亮自為狀其嫻黃倩則狀之其弟邦直又狀之邦亮吾與也緊其嫻之言同將無誣黃氏世為邑之海沙里人雄於貴性獨不競縟麗恬如也陳及婚將迎黃以愛子遠適難之因壻邦亮其家邦亮年少氣高時獨墨墨不自意得

黃氏迎其意與俱歸既婦於陳則卑卑抑降不敢以富人子自多上承旁接下御罔不得其心女紅饋食具有節法舉室咸宜之邦亮素抱遠志樂友勝已摯交修脯不時趨辦室中往往夙備畢給故其游知得國士賢豪驩而邦亮遂褻然品於時英黃氏有助焉生一女適海寧查志高贈給事中繪之孫也夫事忽既往情鍾有涯故先王之叙倫紀為服制重輕久近各殊皆稱情以為差邦亮再婚燕婉舊迹湮淪而於故妻之藏謁予一言

歷四三年申十數請請不怠益強必得乃後已抑可謂厚也已矣不足以厲薄俗乎哉是宜與銘銘曰

於淑質嗟短晷婉清揚閔泉下永爾賢聲慰爾賢雄茲石語

董母陶氏墓誌銘

陶氏故嘉禾名家為贈監察御史楷之女歸於海寧錢山董氏為義官讓之婦太學生深之妻學宮諸生樹及材之母成身成章成大之祖母初陶母歸不逮舅子生

在抱喪其夫險死餘息咿嚶辭闔塵幃中擁孱然二豎
子為命爾於是內隙外侮起乘之悍攘狡竊家蠱絲棼
也陶氏不自顧計委身殉家誓完舊物以還二孤調劑
諸不諧人若事後先務中急緩母事其姑加婉而慎督
其子學肅若嚴父然時時稱舉成立孤遺感厲之故二
子烝烝克諧遺緒支吾勿終墜姑老嫠獨痛不及傷鄉
諸糾紛旋復底定人謂陶氏稱其家子而董有婦云越
若干年嘉靖某年月日陶氏卒卒之又明年嘉靖某年

月日二子葬諸錢山祖塋合太學生之兆先事樹及材以成身來謁銘予病不事筆硯辭二子長跪致母顧言未亡人來為汝家婦懼百憂犯諸難所不盡者命耳自意夷險乘除猶當十半桑榆時迺今僅僅五旬病日益殆殆旦夕從爾父矣樹暨材啜其泣下曰止汝悲徒爾乎樹聞今篤古而迂文而不誣者汝許丈耶必得其文殉我白我信傳我斯不朽我已夫母徒爾悲也樹應曰諾不敢忘夫母生勿善事死重欺之諸孤尚將列於人

哉敢固以請乃不果終辭銘曰

林水窈如幽局不晨兮信誓皦如聯璧瓊潛叶兮吾詩

藻如松聲永言叶兮百代有攷蓬顯不湮兮

許瞻仲妻董氏墓誌銘

董故汴徙也至竹居翁慧父子財豪里中里中多憚屈
之許亢舊閥弗為下兩家由是有郤浸尋爭端里父兄
曰嗟二豪之違言攘攘者我居間幸聽我繁董翁子許
之自出釋釁孰如重親乎兩家亦悟曰善善如父兄言

董遂女于許是為拭卿瞻仲妻董氏董氏父讓讓父竹居翁慧也董氏性警穎曉數計有大父之風父母愛賢之曰兒顧女爾即男才與弟兩人吾所不足者非財也必厚分女財與男等及歸裝資服從盈庭甚都然能不作富人兒驕溢氣舅大理府君姑周安人咸安之瞻仲本強自用大理安人早沒家多虞殖漸落董氏奮曰語有之健婦兼丈夫吾寧能為石人耶於是攬攝內外諸務耕桑豐歉賦役期會儲費盈縮市易苦良字畜登耗

一一目揣心計指課無遺算黠婢狡傭聲氣眉睫輒了
情偽故凡任使莫遺餘力瞻仲於是游戲篆籀展玩圖
繪酣詠尊壺間未嘗問家有無以為常董氏嘗謂其子
曰禮婦不越閭顧我獨慙於斯主人翁多大言少成事
吾為汝家計不得但守書生紙上語耳雖當蓋藏溢羨
然常纖嗇錙銖至喪葬舅姑館穀師儒則悉力厚費無
靳色蓋嘗三斤私藏以紓家急家卒賴之不傾云子男
長聞政郡文學諸生季聞數女三嘉靖某年月日瞻仲

將葬之玄丘山之新塋豫從二子來告曰拭卿獲助於
吾妻甚力葬不可以弗之識也敢請噫是宗婦之有勞
于吾宗者義宜銘銘曰

屏列諸峯席舒重湖室同爾夫地拱爾姑風氣所都百
千年庇爾脣其昌乎

長女沈婦壙誌

某長女貞惠歸為德清博士弟子沈朝臣妻生子之望
而死之望長娶於談游學官則惠死二十又五年乃始

克葬復謀銘以徇諸幽子曰無庸夫石誌不出禮經然
中世以來未之有改也抑皆論撰其先之有德善功烈
勲勞慶賞聲名列於天下而銘之者也惠孱如女子爾
矧其歸不逮姑亡幾何喪其舅左右就養滫瀡旨甘莫
効也子生晬而棄之逝愛而勞以成之末由也歸沈未
浹四期杼軸井臼之勞幾何哉又奚庸銘予尚憶惠童
而喪其母贈孺人沈予時有四方之役則繼封孺人李
母而教之惠祇承無違字其弟過甚愛率諸妹甚嚴刀

尺組維之習蚤夜有程母敢少舍以嬉曰作而作曰息而息曰毋妄言笑則母一或妄言笑咸目屬其色辭罔有差池者李以是教逸而恩浹予以是紓兒女子內顧之懷且意其可勗以修內範成其為良婦已而卒早夭無成銘果奚庸也然予因而自傷焉吾生舉子未言而殤者未髫而殤者指六七舉祿而殤者勿計也婚及笄而夭者五人焉而惠寔始旣天乎予之無罪也予於是興思戚戚矣予又奚忍銘其夫若子請弗置姑為之記

其出及其死若葬云惠家世杭之海寧素花里人遠近
習稱素花許氏惠之生弘治辛酉某月日其歸正德庚
辰某月日其死嘉靖甲申某月日其葬于栗溪南戊申
年某月日於乎有生之類古孰今存兮假合歸盡一氣
孔神兮若水而漚聚散云云兮終委于江長逝渾渾兮
嗟夫兒亟反其真而我猶為人兮

中女朱婦墓誌銘

許氏名金字貞柔海寧靈泉里人也父相卿金生十許

歲喪其母沈長於繼母李李倣古女師訓以婦職金性溫惠靜訥未嘗妄語笑輕喜恚年十八歸河口朱應期生二男懋學念學而天是為嘉靖十五年秋七月丙寅年三十五視其母年加四年耳於戲痛哉金父起諸生嗜學績文日尸坐吾伊不為兒女子謀故金歸裝不充父迂泥古恒以禮繩閨闕諸女子時能拜起則錮之內室課以女紅屬其母申倣肅閑之金及歸不省名父家臧獲故金不習外務於是歸而姑及夫不善是也常陵

藉之金一切安忍面無忤背罔後言獨墨墨不得志時
會弟若妹啜啜下泣也問終不答見父更整容如平時
父捐慙不事事俗鮮或諧家復多故布菽蕭然金數來
寧不及歲時閔勞其父甚至時時為父泣曰人只有身
身外邊那一物是人長有者爺爺作麼甘受苦惱來咽
且語不了父憐傷其意焉方恃以老緊湊然喪雖金數
特短乃其父固厄運奇人與於歲痛哉金死五閱月冬
十二月丁酉將葬之胡橋西祖塋下方其父輟泣志而

銘之銘曰

夫爾葬子爾祀天而全瞑以逝父爾銘志厥悲矢白日
無誣辭

徐仲年妻許氏墓誌銘

許氏諱淑貞小字阿男其母六產女絕欲得男名蓋祓
咎兆祥云淑年十五嬪于徐越若干年嘉靖年月日疾
卒又若干年嘉靖年月日其夫始克葬淑郡西湖之南
之甘露山嗚呼哀哉有形歸盡物理固然吾如天何婉

變膝下奄閼土中吾如情何嗚呼哀哉淑之生也予有
行役及髫其母沈暴死予役未息肩也慙舍以行如鷲
墜巢啞啞索哺意恹程嚴徬徨即路含淒盼閔憐之淑
父故貧母多女淑殿末行裝垂纒矣繼母李拮据荆布
備結縞焉約泰不倫蒙訕受侮掩泣向隅孰誰苦予心
搖搖懸旌然尤切夢想閔憐之淑既抱子戚欣代禪冀
償歲晏而丁年永逝予曷姑閔憐之痛屠吾肉血剝裂
予肺腸者耶嗚呼痛哉淑邑東鄙靈泉里人今徙嘉興

南海上相卿其父徐禾仲年其夫仲年留闈舉士志業
雄其曹博士諸生善肩其男子歸濮其女子娶于查其
子婦壽朋萬朋其孫男淑之歸徐也二親強度務集一
不事事非儀無所於見然其性辟棘在室約侍婢如束
濕薪逮事姑祝祝信佛崇慈子視家衆外內煦如也淑
觀而化來寧從諸婢使面肆踖倚譁笑絕殊故常矣姊
弟若婦目屬心異之嗟夫推剛為柔古壯士為能是以
名顧淑能爾耶而予姪姪多忤不能自克宜於時嘻尚

論古人哉吾慙兒女子也夫系曰

旻天疾威霜殞弱枝形聲歇滅山谷逶迤魂氣悠揚閭閻修塗壤夏繁藏黃墟密而甘露主拱覆金賓趨彌歷千祀胤裔蒙慶尚徵術於堪輿

雲村集卷十四

雲村集後序

先君平生所著詩文甚富晚歲去取而存之重繕而藏去焉先君既沒之四年間造敬陳而覽之恍若過庭時舉古聖賢豪傑之論議而耳提面命也泣然泣數行下曰噫吾父不可作矣繫起之長存者梓是集矣乎然於彌留之際傳寫差謬不及校閱勘正魚豕尚多於是奉集走而謀諸學於先君者董君吳君曰先君晚仕早歸不獲垂勳竹素泯焉無傳造弗忍也造聞文章者經國

之大業不朽之盛事梓是集以永先君可乎二君僉曰
宜子能然其不沒吾師矣受而終讀釐其訛而歸其書
於予予遂梓之而傳其書於世詩賦如干首文如干篇
卷類為十四俟識者覽云男聞造百拜謹識

